

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Taon XXXV Blg. 14
Hulyo 21, 2004
www.philippinerevolution.org

Editorial

Lumalala ang pagkakahiwalay ng rehimeng Arroyo sa mamamayan

Patuloy na nahiiwalay sa pulitika si Gloria Arroyo dahil sa kanyang bulok at brutal na paghahari at sa lumalalang pinsala at kahirapang idinudulot sa mamamayan ng walang pakundangan niyang pagpapakatuta sa imperyalismong US.

Hindi nawawala ang malaking duda ng nakararaming mamamayan sa kanyang pananalo sa eleksyon. Ikinagagalit ng mamamayan ang pagsupil ng rehimen sa mga nagpapahayag ng protesta sa nagdaang pinakamarumi, pinakamadaya at pinakamarahas na halalan sa buong kasaysayan ng mga reaksyunaryong eleksyon sa Pilipinas. Lalong ikinagagalit ng bayan ang pagsagasang ginagawa ngayon ng rehimen sa interes ng hustisya at ng mamamayan para sa pakikipag-"rekonsilyasyon" kina Estrada, sa mga Marcos at iba pang hinatulan na ng mamamayan dahil sa kanilang mga karumaldumal na krimen laban sa bayan.

Araw-araw ay dumarami pa ang mamamayang nakukumbinsi na napakalaki nang pabigat sa masa ang pagpapatuloy ng dati nang mga maka-imperyalistang patakaran sa ekonomya na buong sigasig namang

ipinatutupad ng papet na rehimen. Nagsisilbi lamang ang mga patakarang ito sa mga imperyalistang kumpanyang hayok sa supertubo. Sini-sikil niyon ang mga lokal na negosyo, winawasak ang mga produktibong pwersa, iniwang atrasado ang pambansang ekonomya at pinasasahol ang kahirapan ng mamamayan.

Ang neoliberalisasyon at kaakibat nitong pagbaha ng mga inangat na produktong sumasapaw sa mga lokal na kalakal ang sanhi kapwa ng lalong pagbagsak ng lokal na agrikultura at mga negosyo at ng laganap na disempleyo at paghihikahos sa buong kapuluan. Ang mas malalang larawan ng disempleyo at pagkabangkrap ng ekonomya sa Pilipinas ay naiibsan lamang ng panginibang-bayan ng mahigit walong milyon nang Pilipino para doon maghanapbuhay.



Ang batas sa deregulasyon ng industriya ng langis ang dahilan ng walang tigil na pagtaas ng presyo ng mga produktong petrolyo at libreng-libreng pagkakamal ng gahiganteng tubo ng mga multinasyunal na kumpanya ng langis.

Mga tampok sa isyung ito...

**Pagpapalaya kay
Angelo dela Cruz**

PAHINA 3

**Matagumpay na
depensa sa Samar**

PAHINA 6

**Rebolusyonaryong
gawaing pangkultura**

PAHINA 8

Ang deregulasyon at pribatisasyon ng mga batayang serbisyo ang nasa likod ng walang habas na pagtaas ng singil sa kuryente at tubig, serbisyong pangkalusugan at pang-edukasyon.

Sa harap ng lahat ng ito, sadyang pinananatiling nakapako sa napakababang halaga ang sahod ng mga manggagawa at sweldo ng mga kawani kapwa sa gubyrerno at pribadong sektor. Sadya ring tini-tipid ang gastos para sa mga batayang serbisyo bilang pagtalima sa kagustuhan ng mga imperyalistang ahensya. Balak pang lalong pigain ang mamamayan sa pamamagitan ng pagpapataw ng dagdag na mga buwis, alinsunod rin sa dikta ng mga imperyalista.

Ang pangangayupapa ni Arroyo sa kanyang imperyalistang amo sa usapin ng ekonomya ay nasasalamina din sa bulag niyang pagpapatupad ng "anti-teroristang doktrina" ng gubyrernong Bush sa Pilipinas. Bilang "ikalawang larangan" umano sa "anti-teroristang gera" na itinutulak ng US, namumukod-tangi ang gubyrernong Arroyo sa Asia bilang pinakamasugid na tagasuporta at tagapagpatupad ng lahat ng antinasyunal, anti-mamamayan, ma-

paniil at teroristang patakaran at hakbangin ng rehimeng Bush sa Pilipinas at maging sa ibayong dagat.

Sa lubusan nitong pangangayupapa sa imperyalistang amo, hinahayaan ng rehimen ang US na lapastanganin ang pambansang soberanya, sagasaan ang pambansang teritoryo, gawing base militar ang buong Pilipinas at panghimasukan ang mga panloob na usapin ng bansa. Tinataguriang pagsasanay-militar ang mga operasyong militar ng mga pwersang Amerikano sa mga lugar na pinamumugaran umano ng mga "teroristang Moro."

Sa ngalan din ng "gerang anti-terorista," tuluy-tuloy at malawak ang mababangis na operasyong militar ng mga pwersa ng gubyrerno at walang pakundangang paghasik nila ng terorismo at paglabag sa mga karapatang-tao sa mga lugar na pinagsususpetsahang pugad ng BHB at MILF/BMIAF. Binabalak na ring papasukin ang mga pwersang Amerikano sa mga rebolusyonaryong erya.

Para ipakita ang lubusang pagpapakatuta kay Bush, nagpadala ang rehimeng Arroyo ng 97-kataong *humanitarian contingent* bilang su-

portang pampulitika sa imperyalistang okupasyon ng US sa Iraq. Sa bilang na ito, 55 ang tropang militar.

Ngunit nayanig ang rehimen sa pampulitikang implikasyon ng pagbihag ng mga militanteng Iraqi sa manggagawang si Angelo dela Cruz. Napilitan itong pauwiin ang mga tropang Pilipino hindi lamang para iligtas si dela Cruz kundi lalo't higit ay isalba ang sarili sa matinding galit ng bayan kapag natuloy ang pagpugot sa bihag.

Alam ni Arroyo na di hamak na mas bibigyan pa rin ng diin ng kanyang mga imperyalistang amo ang buong-pangangayupapa niyang pagpapatupad ng mas mahahaling mga patakaran hinggil sa imperyalistang "globalisasyon" at "gerang anti-terorista" kaysa sa pagkawala ng simbolikong presensya ng ilang tropang Pilipino sa Iraq. Gayunman, tiyak na may kapalit na malalaking konsesyong ibibigay ang rehimen sa amo nitong imperyalista dahil malaking sampal pa rin sa US ang pag-atras ng mga tropang Pilipino sa gitna ng sunud-sunod nang pag-atras ng mga tropa ng dating sumusuporta sa gera at okupasyon ng US sa Iraq.

Maaaring panandaliang makapagbabango ang rehimeng Arroyo sa mamamayan, subalit lilitaw at lilitaw ang tunay nitong maka-imperyalista at anti-mamamayang paninindigan. Titimo sa isipan ng sambayanan na walang karapatang manatili pa si Arroyo sa Malakanyang dahil patuloy nitong pagdudusahin ang sambayanan nang anim o higit pang taon.

Sisidhi ang pagnanais ng mamamayan na wakasan na ang kanilang pagtitiis. Patuloy na lalala ang pagkakahiwalay ni Arroyo sa malawak na masa ng sambayanan. Mabubuo ang malawak na pagkakaisa ng mamamayan na hamon sa patuloy na pananatili ni Arroyo sa poder. **AB**



Taon XXXV Blg. 14 Hunyo 21, 2004

Ang *Ang Bayan* ay inilalabas sa wikang Pilipino, Bisaya, Iloko, Hiligaynon, Waray at Ingles.

Maaari itong i-download mula sa Philippine Revolution Web Central na matatagpuan sa:

www.philippinerevolution.org

Tumatanggap ang *Ang Bayan* ng mga kontribusyon sa anyo ng mga artikulo at balita. Hinihikayat din ang mga mambabasa na magpaabot ng mga puna at rekomendasyon sa ikau-unlad ng ating pahayagan. Maaabot kami sa pamamagitan ng email sa: angbayan@yahoo.com

Nilalaman

Editoryal: Lumalala ang pagkakahiwalay ng rehimen	1
Paglaya ni Angelo dela Cruz	3
Paglabag sa karapatang-tao sa EV	5
Matagumpay na depensa sa Samar	6
Militarisasyon sa Quezon	7
Gawaing pangkultura sa Panay	8
Patakarang panlabas ng US	10
Balita	11

Ang *Ang Bayan* ay inilalathala dalawang beses bawat buwan ng Komite Sentral ng Partido Komunista ng Pilipinas

Tagumpay ng mamamayan ang pagpapalaya kay Angelo dela Cruz

Nitong Hunyo 20, pinalaya na ng mga bumihag sa kanya ang Pilipinong drayber na si Angelo dela Cruz, isang araw matapos iatras ang mga mersenaryong tropa ng Pilipinas sa Iraq.

Dinukot sa Baghdad, Iraq si dela Cruz noong Hulyo 7 ng mga myembro ng Khaled bin al-Waleed Corps, isang bahagi ng Islamic Army na lumalaban sa okupasyon ng US sa Iraq. Ayon sa mga bumihag, pupugutan nila si dela Cruz kung hindi aalis pagsapit ng Hulyo 20 ang 51-kataong tropang Pilipino na sumusuporta sa gerang pananalakay at okupasyon ng US sa Iraq. Ang petsang itinakda ng mga gerilyang Iraqi ay mas maaga nang isang buwan kaysa dati nang itinakda ng rehimeng Arroyo.



Sa umpisa, idineklara ni Arroyo na hindi niya iaatras nang mas maaga ang mga tropa. Mas ginusto niyang isakripisyo ang buhay ni dela Cruz sa pagsuporta ng "gerang anti-terorista" ng US at pagmamantine ng mahusay at masunuring pakikipagrelasyon sa kanyang imperyalistang amo.

Ginagamit ngayon ng rehimeng Arroyo ang paglaya ni dela Cruz upang magpabango at isalba ang sumayad na popularidad nito. Walang kahihiyang binabalak ng rehimen na iparada si dela Cruz sa State of the Nation Address upang palabasin at ipangalandakang si Arroyo ang sumagip sa buhay ni dela Cruz.

Gusto na namang lokohin ni Arroyo ang bayan. Una sa lahat, ang naglagay sa panganib ng buhay ni dela Cruz at milyong iba pang Pilipinong manggagawa sa Middle East ay ang lubos na pagsuporta ng kanyang rehimen sa paglusob at pag-okupa ng imperyalismong US sa Iraq. Ngayon naman, gustong angkinin ni Arroyo ang karangalan sa pagsagip sa buhay ni dela Cruz.

Pinanindigan at inulit-ulit

lamang ng rehimeng Arroyo ang napabulaanan nang mga kasinungalingang ginamit na katwiran ng rehimeng Bush sa pananalakay ng US sa Iraq. Napatunayan nang malaking kasinungalingan ang mga idinahilan nina Bush na pagtatago umano ng *weapons of mass destruction* at kaugnayan din umano sa Al Qaeda ng pilit pinatalsik ng US na rehimen ni Saddam Hussein. Napatunayang walang makatarungan o anumang ligal na batayan ang gera at okupasyon ng US sa Iraq at sa gayon ang masugid na pagsuporta rito ng rehimeng Arroyo. Wala ngang ibang marapat lamang kundi ang pagpapauwi ng mga mersenaryong tropang Pilipino roon.

Sinalubong ang pagmamatigas ni Arroyo ng malawakang mga protesta sa buong bansa. Sa loob ng dalawang linggo mula nang mabihag si dela Cruz, pinatampok ng mga aksyong protesta sa buong bayan ang mariing pagtutol ng mamamayang Pilipino sa todong suporta ng rehimeng Arroyo sa di makatarungang agresyon at okupasyon ng imperyalismong US sa

Iraq.

Sinikap ng rehimen na pigilin ang mga demonstrasyon sa lansangan na naggigiit sa pagpapauwi ng mga mersenaryong pwersang Pilipino sa Iraq. Brutal at walang pakundangan ang pagbubuwig ng mga pulis sa mga protesta. Sinikap din ng rehimen na busalan ang masmidya at iba pang pagpapahayag ng pagtutol sa rehimen.

Sinubukan din ng rehimen ang iba pang mga paraan, pati na ang pakikipagnegosasyon at pagsuhol ng \$6 milyon sa mga gerilyang Iraqi para mapalaya si dela Cruz nang hindi na sana kailangang pauwin pa ang mga sundalong Pilipino sa Iraq. Ngunit tinanggihan ito ng mga gerilya.

Dumagundong sa buong bayan ang mga panawagan para sa agarang pagpapalaya kay dela Cruz at lumawak ang mga protesta ng mamamayan sa todo-todong suporta sa imperyalistang okupasyon ng US at pagpapadala ng mga sundalong Pilipino sa Iraq.

Sa harap nito, walang nagawa ang rehimeng Arroyo kundi iatras ang mga mersenaryong tropa, hindi

pa upang iligtas si dela Cruz kundi upang isalba ang sarili.

Noong Hulyo 12, nagpahayag si Arroyo na pauwiin na nang mas maaga ang mga tropang Pilipino sa Iraq. Pagsapit ng Hulyo 19, nakauwi na sa Pilipinas ang lahat ng mga tropang Pilipino mula sa Iraq.


Hindi si Arroyo ang tunay na nagpalaya kay dela Cruz kundi ang mariin, militante at malawak na pakikibaka ng mamamayang Pilipino para iuwi mula sa Iraq ang mga tropang Pilipino at isalba hindi lamang si dela Cruz kundi pati ang iba pang naisapanganib na manggagawang Pilipino sa Iraq at sa Middle East.

Ang paglaya ni dela Cruz ay tagumpay ng walang iba kundi ang mamamayan laban sa hungkag na "gera kontra-terorismo" ng US sa Iraq na lubos na sinusuportahan ng papet na rehimeng Arroyo. Ang tagumpay na ito ay ipagdiriwang hindi lamang ng mamamayang Pilipino kundi pati ng mamamayang Iraqi at ng lahat ng mamamayang tumututol sa pagla-

pastangan ng US sa soberanya at kasarinlan ng ibang mga bansa sa daigdig.

Nadismaya ang US sa pag-atras ng mga tropang Pilipino sa Iraq laluna't dagdag na naman ang Pilipinas sa dumaraming dating sumusuporta sa gera ng US na nag-atras na ng mga tropa roon. Nauna nang umatras ang Spain, Dominican Republic, Nicaragua, Honduras, Norway, Moldova at Singapore. Ang Thailand at New Zealand ay nakataklang mag-atras din sa Setyembre ng mga tropa. Nagpahayag na rin ang The Netherlands at Poland ng planong pag-atras.

Ayon sa mga tagapagsalita ng guberno ng US, ang pag-atras ng mga tropa ay pagluhod sa mga terorista at pagpapahiwatig na maaari nila itong ulit-ulitin pa sa hinaharap. Gustong takpan ng ganitong pahayag ang katotohanan na ang kasakiman at agresyon ng numero unong terorista sa daigdig—ang imperyalismong US—ang puno't dulo ng lahat ng kaguluhan ngayon sa Iraq, sa buong Middle East at sa iba pang bahagi ng mundo. **AB**



Pagbuwag sa rali, binatikos

MARIING binatikos ni Kasamang Luis Jalandoni, pinuno ng *negotiating panel* ng National Democratic Front of the Philippines (NDFP), ang marahas na pagbuwag noong Hulyo 13 sa rali na naggigiit na agarang pauwiin sa bansa ang mga sundalong Pilipino sa Iraq. Ayon kay Jalandoni, kaduda-duda ang integridad at katapatan ng gubyernong Arroyo na ipagpatuloy ang usapang pangkapayapaan dahil sa tahasang paglabag ng mga *anti-riot police* sa Comprehensive Agreement on Respect for Human Rights and International Humanitarian Law (CARHRIHL). Ani Jalandoni, nilabag ng mga pulis ang Art. 2, Blg. 12 ng CARHRIHL na gumagarantiya sa malayang pamamahayag, pagsapi at pagtitipon.

Binatikos din ni Jalandoni ang rehimeng Arroyo sa pagsapanganib ng buhay ng milyun-milyong OCW sa asal-tutang pagsuporta nito sa iligal na okupasyon ng US sa Iraq at pagpapadala roon ng mga sundalo at manggagawang Pilipino.

Pinagbabatuta at dinakip ng mga kasapi ng Western Police District ang ilang upisyal at kasapi ng Bagong Alyansang Makabayan (BAYAN) at iba pang progresibong organisasyon sa marahas na dispersal sa Plaza Miranda. Nagtamo rito ng malaking sugat sa ulo si Dr. Carol Pagaduan Araullo, ikalawang tagapangulo ng BAYAN at tagapangulo ng Plunder Watch. Kasama sa limang hinuli at ikinulong si Renato Reyes, tagapagsalita ng BAYAN. **AB**

Mga kaso laban kay Palparan, ipupursige

IPUPURSIGE ng Bayan Muna sa Department of Justice ang agarang paglilitis sa mga kasong kriminal na isinampa kay Brig. Gen. Jovito Palparan, kumander ng napaatras na mga tropang Pilipino sa Iraq, ngayong nakabalik na siya sa bansa. Nakatakas ang berdugong si Palparan sa pag-uusig ng hukuman noong nakaraang taon nang hirangin at italaga siya ni Arroyo na mamuno sa Philippine "humanitarian contingent" sa Iraq.

Matatandaang daang mga kaso

ng paglabag sa karapatang-tao ang nangyari sa Mindoro sa loob ng dalawang taong naging kumander siya ng 204th Infantry Brigade. Kabilang dito ang pagpatay sa 18 kasapi at tagasuporta ng Bayan Muna. Tampok dito ang mga kaso ng pagpatay kay "Choy" Napoles, Jr., *coordinator* ng Bayan Muna sa Mindoro noong 2002 at pagdukot at pagsalbeyds kina Eden Marcellana, upisyal ng KARAPATAN-ST, at Eddie Gumanoy, lider magsaka ng Timog Katagalugan noong 2003. **AB**

Lumalalang paglabag sa karapatang-tao sa Eastern Visayas

Patuloy ang pagtindi ng mga paglabag sa karapatang-tao sa Eastern Visayas bunga ng walang habas na militarisasyon sa kanayunan.

Sa Eastern Samar, tatlong inosenteng sibilyan ang pinatay ng mga nag-ooperasyong pasistang sundalo nitong Hunyo at Hulyo.

Pinakakarumal-dumal na kaso ang pagsalbeyds kay Rogelio Nuncio, 32, isang magsasakang taga-Barangay Tangbo, Maslog. Natagpuan ang kanyang naagnas nang bangkay sa loob mismo ng kapilya ng barangay noong Hulyo 2 nang magsibalikan ang mga magsasakang nagbakwit nang maglunsad ng operasyong militar sa kanilang lugar ang Charlie Company ng 14th IB. May tama ng bala sa kanyang sentido si Nuncio at may taga sa ulo. Inukit din ang kanyang mata.

Pinatay si Nuncio dahil lamang sa may kapatid siyang kilalang kasapi ng Bagong Hukbong Bayan (BHB).

Pagkaraan ng dalawang araw, walang awa ring pinatay ng mga elemento ng parehong yunit si Bernardo Amado, isang magsasakang taga-Sityo Baynag, Barangay Canilay, Can-avid. Si Amado, na may kاپانسanan sa pag-iisip, ay basta na lamang pinaratangang myembro ng BHB nang hindi siya makasagot sa mga tanong ng mga sundalo.

Noon namang Hunyo 12, sinalbeyds ng isang sundalo ng 14th IB na nagngangalang "Garcira" at dalawang elemento ng CAGU si Freddie Rebato, isang magsasakang taga-Barangay Tugas, Maslog. Natagpuan si Rebato na nakadipa at mahigpit na nakatali ang dalawang kamay sa isang punong kahoy, basag ang bungo at

tadtad ng sugat ang katawan.

Sa Samar, dinukot at iligal na idinitine ng mga sundalo ng 34th IB at 7th Scout Rangers Coy ang walo katao mula sa Barangay Sto. Niño, Motiong nitong Hulyo. Ang mga biktima ay kinabibilangan ng isang pamilyang magsasaka at ang kapitan, isang konsehal at dalawang tanod ng naturang barangay na nagpunta sa kampong militar para hanapin ang nawawalang pamilya.

Nagtatrabaho sa kanilang sakahan ang buong pamilya ni Artemio Lazarra, 39, nang dumating ang may 20 sundalong nag-ooperasyon noong Hulyo 4. Tinutukan ng baril at pilit nilang isinama si Lazarra at ang mga anak niyang sina Josephine, 13; Jocelyn, 12; at Jonathan, 9. Isang Lieutenant Penzona at Sergeant De Guzman ang nakilalang kasama ng yunit na iyon.

Kinabukasan, bandang alas-2 ng hapon, hinanap ni Barangay Capt. Leonardo Gabane at tatlo pa niyang kasamahan ang pamilyang Lazarra, subalit idinitine rin sila ng militar

Limang araw na hinawakan ng AFP ang mga biktima nang walang kasong isinasampa sa kanila. Pinakawalan lamang sila nang isinumbong ang insidente sa Katungod (tsapter ng Karapatan sa Eastern Visayas) at sa *provincial chapter* ng Bayan Muna.

Bago ito, dinukot din ng 34th IB noong Hunyo 27 si Liberato Racab, isang magsasakang taga-



Sityo Tar-as, Barangay San Miguel, Jiabong. Hanggang ngayon ay hindi pa siya natatagpuan.

Sa Leyte, tatlong minutong pinagpuputukan ng masinggan at M14 ng mga tropa ng 19th IB sa pamumuno ni 1Lt. Onofre Nelmidang ang 13 magsasakang papunta sana sa kanilang pahingahan sa Dinanawan, Ormoc City noong Marso 27.

Dinakip at pinilit maggiya sa operasyon ang pito sa kanila—sina Marcelo Custodio, 20; Orteliano Dador, 55; Reynaldo Dador, 33; Christopher Muya, 22; Macario Tumampo, 22; Crispin Tumampo, 25; at Mario Cabacoy. Pinagbubugbog sina Cabacoy at Dador. Nakatakbo naman ang anim na iba pa.

Sa araw ding iyon, dinakip at pinilit ding maggiya ng naturang yunit militar ang tatlo pang magsasaka—sina Jonie Polenio, Avelino Evan at ang kanyang asawa.

AB



Matagumpay na depensa ng BHB sa Northern Samar

Apat, di nagapi ng apatnapu

Noong Mayo 5, ipinamalas ng mga Pulang mandirigma sa Northern Samar ang mataas na kakayahan ng BHB na ipreserba ang sarili at magdulot ng matinding bigwas sa hanay ng kaaway. Armado ng apat na *high-powered rifle* at isang pistola, matagumpay na nakapagtanggol ang isang tim ng Rodante Urtal Command laban sa 40 sundalo ng 20th IB na sumalakay sa isang kampo ng BHB sa Barangay Palanit, San Isidro, Northern Samar.

Sa dalawang oras na labanan, walang napatay ni nasugatan sa panig ng BHB. Samantala, anim hanggang walo ang napatay at lima ang nasugatan sa panig ng kaaway. Dahil sa karanasang ito, higit na tumaas ang moral at kakayahang lumaban ng mga Pulang mandirigma.

Noong araw ng reyd, sampung Pulang mandirigma ang nasa kampo habang ang iba pa ay naggagawaing masa sa malalapit na baryo. Bandang

alas-7 ng umaga, nasa itaas ng burol malapit sa kampo ang dalawang kasama nang makita nilang papalapit ang mga sundalo. Agad nilang pinaputukan ang mga ito, sabay dapa at kober. Gumanti ang kaaway at pinaulanan ng bala ang nakakober na mga kasama.

Agad na umaksyon ang iba pang mandirigma na nasa kampo: pumusisyon sila para magdepensa, nagligpit ng mahahalagang gamit, at nagpatakbo ng isa upang tumulong sa dalawang nakahiwalay na kasama.

Habang walang pakundangang nagpapaputok ang kaaway, ligtas na nakaatras pabalik sa kampo ang tatlong kasama. Doo'y mabilis na ginanap ang konsultasyon ng mga nasa patnugutan ng yunit at ipinasyang magtatalaga ng isang tim ng mga mandirigmang magpi-*pin down* sa kaaway habang umaatras ang iba pang myembro ng iskwad.


Agad pumusisyon ang tim ng apat na Pulang mandirigma sa mahusay na tereyn, handang bi-
rahin ang sinumang sundalong susulong. Ang hawak nila: dalawang M14 at dalawang M16. May dala ring .45 na pistola ang isang myembro ng tim.

Sa kabila ng kani-

lang superyor na bilang, hindi nakontrol ng 40 sundalo ang labanang tumagal nang dalawang oras. Ipinakita ng mga nakipaglabang Pulang mandirigma ang kani-
lang husay sa pakikidigmang gerilya, kapwa sa kabatiran sa tereyn at mga taktikang pangkombat. Disiplinado rin sila sa paggamit ng bala—tig-iisang magasin lamang ang naubos nila sa buong labanan. Subalit mabisa silang nakapagpaputok at nakapagmaniobra sa iba't ibang pusisyon sa tereyn na kabisadong-kabisado nila, hanggang sa tuluyang malito ang kaaway at mabulabog ang anumang pagtatangka nilang sumugod.

Patunay ng sobrang pagkataranta ng kaaway, ilang beses na narinig ng mga kasama ang sigawan ng mga sundalo na tumutukoy sa mga pusisyon umano ng BHB. Subalit ang totoo'y kinlalalagyan ng kapwa nila sundalo ang kanilang mga tinutukoy. Kaya noong bandang huli, sila-sila na rin ang nagbarilan.

Nanatiling mataas ang diwang palaban ng mga Pulang mandirigma. Samantala, matindi ang demoralisasyon ng mga sundalong basta na lamang pinasusugod ng kanilang mga upisyal, kahit malinaw na pinupuruhan na sila ng mga Pulang mandirigma. Hanggang sa tuluyang pag-atras ng mga Pulang mandirigma bandang alas-9 ng umaga, wala ni isa sa kanila ang tinamaan. Sa kabilang banda, sa tantya ng mga kasama ay isa ang napatay at lima ang nasugatan sa mga sundalo. Ayon naman sa mga magsasakang nakatira malapit sa lugar, walong sundalo ang patay



"Depensa", sundan sa pahina 7

Laban sa matinding militarisasyon sa Quezon

Habang pinananatili ng rehi-meng Arroyo ang Southern Tagalog bilang "pambansang prayoridad" sa usapin ng paglaban sa mga rebolusyonaryong pwersa, kasunod ng Mindoro ang prubinsya ng Quezon sa mga lalawigan pinupuruhan ngayon ng militarisasyon sa rehiyon. Matatag at epektibo naman itong nalalabanan ng mga rebolusyonaryong pwersa at baseng masa sa prubinsya.

Permanenteng nakadeploy sa prubinsya ang 201st Bde na may dalawang batalyon (74th at 76th) at 38 kumpanya ng CAFGU. Karamihan sa mga tauhan ng 74th at 76th IB ay mga dating tropa ng Scout Rangers na bihasa sa mga taktikang "counterinsurgency." Panapahon, sumasanib sa mga ope-

rasyong militar sa prubinsya ang 59th IB na nakabase sa Laguna. Dagdag dito, tatlong kumpanya ng PNP Provincial Mobile Group (416th, 417th at 418th) ang regular na naglulunsad ng mga operasyon sa mga interyor na bahagi ng prubinsya.

Dinidiinan ng kaaway ang mga lugar dito na pinaghihinalaang base ng BHB at may madalas na presensya ng hukbong bayan. Nagdirin din sila sa mga bahaging kapatagan at makapal ang populasyon, at mga sentrong bayan at kalunsuran kung saan malakas ang demokratikong kilusang masa.

Katulad sa iba pang bahagi ng bansa, ginagamit ng AFP dito ang taktika ng "pagdumog," gamit ang malalaking pwersa. Kinatatangian


ito pangunahin ng pagsasanib ng iba't ibang yunit ng AFP at PNP sa mga operasyon at paggamit ng iba't ibang paraan para sa mas mabilis na deployment ng mga tropa sa lugar ng labanan.

Kasabay ng malakihan at mabilisang mga operasyong militar, pinalakas ng AFP ang mga pwersang teritoryal. Itinatayo rin ang maraming kampo, malawakang nagrerekruit para sa CAFGU at naglalatatag ng malawak na lambatanik sa pamamagitan ng mga Barangay Intelligence Network sa layuning mahawakan at masubaybayan ang lugar.

Ang lahat ng ito ay matatag na hinaharap ng BHB at rebolusyonaryong mamamayan ng Quezon. Aktibo nilang nilalabanan ang papalaking operasyong militar sa mga larangang gerilya at ang kasabay na mga pang-aatake sa demokratikong kilusang masa.

Sa kabila ng lakas at dami ng militar sa prubinsya at ng mga inilulunsad nitong malalaking operasyon, hindi lamang napepreserba ng BHB ang sarili at ang baseng masa nito, nakapagdudulot pa ito ng matitinding bigwas sa kaaway.

Mula Mayo hanggang Hunyo ngayong taon, apat na malalaking operasyon ng militar ang binigo ng mga pwersa ng BHB. Ipinamalas sa magkakahiwalay na labanang ito ang kakayahang magtanggol at



"Depensa," mula sa pahina 6

o sugatan at karga-karga ng kaniyang mga kasamahan paalis sa labanan.

Noong sumunod na mga araw, laking gulat at tawanan ng mga kasama at magsasakang nakaaalam

sa tunay na pangyayari nang magmayabang sa masmidya si Maj. Gen. Glen Rabonza ng 8th ID na nakapatay daw ang mga tropa ng 20th IB ng pitong Pulang mandirigma. Ang totoo, bukod sa wala ni isang kaswalti ang mga

kasama ay walang ibang nakuha ang kaaway kundi isang naiwang magasin ng 9 mm at dalawang generator na natagpuan din lamang nang balikan ng mga sundalo ang kampo at gumamit ng aso sa paghahanap. **AB**

lumaban ng BHB. Napangibabawan ng relatibong maliliit na yunit gerilya ang mas malalaking pormasyong pandumog ng AFP. Habang dumarami ang pasistang tropa na pumapasok sa saklaw ng rebolusyonaryong kilusan, dumarami rin ang target ng mga taktikal na open-siba ng BHB.

Noong Hunyo 20, nakasagupa ng Maria Theresa De Leon Command (MTDLC) ang mga elemento ng 74th IB na nag-ooperasyon sa hangganan ng mga bayan ng Mulanay at San Francisco. Palipat ang mga Pulang mandirigma sa kasunod na baryo nang makita nila na nagpapahinga sa gilid ng sapa ang militar. Kagyat nilang pinaputukan ang mga tropa ng kaaway at napatay ang tatlo sa mga ito. Ang yunit militar na ito ay may mahabang listahan ng paglabag sa karapatangtao sa Far South Quezon.

Bago ito, hinaras ng MTDLC ang mga nag-ooperasyong tropa ng 74th IB sa Barangay Taingon, San Francisco, Quezon. Apat na elemento ng AFP ang napatay. Hindi nakaganti ng putok ang pwersa ng AFP. Dulot ng matinding demora-

lisasyon, nagbalikan sa kanilang kampo ang iba pang nag-ooperasyong yunit ng 74th IB.

Noong Hunyo 16, napalaban ang isang yunit ng Apolonio Mendoza Command (AMC)-BHB nang tambangan sila ng isang platun ng 74th IB sa Barangay Nanadiejo, Mulanay. Umabot sa tatlong oras ang labanan ngunit naagaw ng mga Pulang mandirigma ang inisyatiba sa unang bugso pa lamang ng putukan. Agad na napaatras ang tropa ng AFP kung kaya't nakapag-asolt ang mga kasama at naitaboy sa iba't ibang direksyon ang mga pwersa ng militar.

Epektibo namang nahadlangan ng *blocking force* ng BHB ang reim-porsment na lulan ng isang *armored personnel carrier* at dalawang siksbay. Pinasabugan ng BHB ng isang *command-detonated land mine* ang naunang trak sa kanilang komboy.

Nakasamsam ng isang M16 ang BHB. Labinlimang militar ang napatay at di mabilang ang sugatan. Sa iba't ibang lugar inilabas ng mga sundalo ang kanilang mga patay at sugatang kasamahan upang pagtakpan ang kanilang kahihiyan.

Pinalabas nila sa midya na isa lamang ang napatay at tatlo ang nasugatan sa militar.

Samantala, nasugatan ang Pulang mandirigma na si Renato Vergara o Ka Medel. Namatay siya habang iniaatras sa lugar ng labanan.

Noong Mayo 5, kinubkob ng 70-kataong komposit na yunit ng 59th IB, 74th IB at 76th IB ang isang malaking platun ng AMC na nakahimpil sa Barangay Anyaw, Catanaun. Nakapanlaban ang mga Pulang mandirigma at kagyat na nakaalis sa kordon ng kaaway. Gayunpaman, limang mandirigma ang namatay sa proseso ng pagtatanggol.


Apat ang kaagad na napatay sa panig ng AFP, kabilang ang isang Lt. Ferrer, ang kumander ng sumalakay na yunit. Ayon sa mga residente sa lugar, aabot sa 16 ang napatay na kaaway. Katulad ng ginawa sa Mulanay, lihim na inilabas ng militar ang mga bangkay at sugatan sa karatig-bayan ng Catanaun at ang iba ay isinakay sa helikopter upang di malaman ng taumbaryo at ng midya ang tunay na bilang ng mga kaswalti. AB

Muling sumisibol ang rebolusyonaryong gawaing pangkultura sa Panay

Sumisigla ngayon ang rebolusyonaryong gawaing pangkultura sa Panay makaraan ang mahigit isang dekadang pananamlay nito. Maraming lumalaganap ngayong lathalain mula sa rehiyon na naglalaman ng mga tula, awit, anekdota, maikling kwento, komiks at dibuho. Nasimulan na rin ang paggawa ng mga bidyo dokumentaryo.

Noong Pebrero 2004, muling inilathala ang *Sublak* o "sibol," isang rebolusyonaryong magasing pangkultura sa rehiyon. Tumiklop ito noong 1989 nang mamayani ang maling linya ng ad-

benturismong militar at insureksyunismong lunsod at napabayaang gawaing pangkultura. Layunin sa muling paglalabas nito ang pagpopularisa ng mga rebolusyonaryong adhikain at karanasan ng mga Pulang mandirigma, masang anakpawis at iba pang demokratiko at patriyotikong sektor sa pamamagitan ng panitikan at likhang-sining.



Kalipunan ng mga awit at tula. Nahahati sa apat na bahagi ang bagong edisyon ng *Sublak*.

Sa unang bahagi, may 23 tulang nakasulat sa Hiligaynon. Ilan sa mga ito ay may salin din sa Ingles at Pilipino. Mapapansing karamihan sa mga nag-ambag ng kanilang mga tula ay bagong sibol na mga manunulat—mga kadre ng Partido, upisyal at Pulang mandirigma, mga organisador ng mga manggagawa, magsasaka, mangingisda, maralita ng lunsod at pambansang minorya.

Binubuo ng apat na *ambahanon* (awit) ang ikalawang bahagi. Sa estilo ng popular at tradisyunal na *composo*, *sugidanon* o *ismayling*, epektibong naipahayag sa "Ig-pahu," "Kasaysayan sang Baryo," "Grupong Binuligay" at "Ambus sa Malinao" ang mga saloobin at adhikain at pakikibaka ng mamamayan sa pagsusulong ng rebolusyong agraryo, pagpapaunlad ng produksyon at paglaban sa militarisasyon, sapilitang ebakwasyon, pangangamkam ng lupa at ang kagitingan ng BHB, sabay ang paghihikayat na sumanib sa lumalawak na hanay ng pambansa-demokratikong kilusan. Nilikha ang mga awiting ito ng mga grupong pangkultura ng BHB sa Central at Southern Front.

Mga sugilanon. Naglalaman ng dalawang maikling *sugilanon* (kwento) ang ikatlong bahagi. Inilarawan ng *Dalugdog sa Septyembre* ni Rio Roja ang praktika ng isang bagong buong SYP sa Northern Front noong maagang bahagi ng dekada 1970 mula sa kawalang-karanasan nito sa pagbubuo ng base at hukbong bayan hanggang sa pagtambang nito sa kaaway sa unang pagkakataon. Sinariwa naman ng *Tinipik sang Kasaysayan* ni Maya Mor ang pagmasaker ng mga

pasistang tropa ni Magsaysay sa 37 kadre, kumander at kasapi ng Hukbong Mapagpalaya ng Bayan (HMB) na nagpupulong noong Abril 27, 1953 sa Taruytoy, Libacao, Aklan. Dalawa sa mga nakaligtas dito, sina Kumander Coronacion "Waling-Waling" Chiva at asawa niya, ay gumamap ng malaking papel sa pagpapalawak ng BHB sa Border Area ng Iloilo-Capiz-Aklan noong 1972.

Panghuling bahagi ng *Sublak* ay komiks tungkol kay "Caduy," ang batang naging popular na karakter sa komiks na nagsimulang lumabas noong 1982 sa mga pahina ng *Daba-Daba*, ang pahayagang masa ng rehiyon.

Rebanek. Hindi sa lahat ng oras ay seryoso ang mga rebolusyonaryo. Sa araw-araw nilang buhay-at-kamatayang pakikibaka, marami ring sumusulpot na nakatatawang insidente, sadya man o hindi. Upang kunan ng mga aral, inipon ang mga ito nina Rubio Rus Lucha at Maya Mor sa 44 na dagli at pinamagatang REBANEK o mga rebolusyonaryong anekdota.

May ilan pang kalipunan ng mga sulatin tulad ng *Poems, The Enemy's Son and Other Poems from the Warfront* (23 tula) at *Hiwalaybay nga Walay Prosodyo* (30 tula)—lahat ni Maya Mor—at *Pila ka Binalaybay kag Ambahanon ang akon Gingikanan* (mga liham, awit at tula) ni Bayani Obrero.

Inaasahan sa muling pagsibol ng rebolusyonaryong gawaing pangkultura na marami pang mahihikayat at makakikita ng panahon na magpahayag sa masining na paraan ng kanilang mga saloobin tungkol sa sarili, sa mga minamahal, sa lipunan at sa rebolusyon kahit sa gitna ng pakikipaglaban sa kaaway at paggampan ng iba't iba pang mga praktikal na gawain sa rebolusyon. **AB**

Maikling bidyo

Noong Marso 2003, ginawa ng mga kasama sa Panay ang isang maikling pelikulang *Panait sang Tumanduk*. Sa salitang Kinaray-a, ang ibig sabihin nito ay ritwal ng mga awitin at sayaw ng mga Tumanduk para sa ulan at masaganang ani.

Tinatalakay sa mahigit 20 minutong bidyo kung paano matagumpay na napagkaisa ang mga Tumanduk sa hangganan ng Aklan-Capiz-Iloilo laban sa pangangamkam ng 3rd Infantry Division ng Philippine Army sa 33,310 ektaryang lupaing minana pa ng mga Tumanduk mula sa kanilang mga ninuno.

Binalikan nito ang epikong bayan ng Panay tungkol sa pakikihamok ni Labawdungon sa mga banyaga. Humantong ang pagsasalaysay sa pagsisimula ng gawaing pag-oorganisa ng BHB sa mga Tumanduk at kung paanong mula 1973 hanggang sa kasalukuyan ay itinuring nang katuwang ng mga Tumanduk ang BHB sa pakikibaka para bawiin ang kanilang lupang ninuno.

Patunay ng mahigpit na pagkakaisa ng mga Tumanduk at ng BHB ang pag-unlad ni Ka Bob (Ismael Giganto), mula sa pagiging kabataang aktibistang Tumanduk na nakikipaglaban para sa karapatan sa lupa ng kanilang tribo hanggang sa pagiging responsableng kadre ng Partido at Pulang kumander ng BHB. Namartir si Ka Bob sa isang matagumpay na ambus laban sa SOT ng Task Force Panay noong Pebrero 2003. **AB**

Maaaring matunghayan ang mga nabanggit na akda sa seksyong pangkultura ng Philippine Revolution Web Central @www.prwc.org.



Lumalakas ang pagtutol sa patakarang panlabas ng US

Sunud-sunod na dagok

Lumalala ang pagkakahiwalay ng US sa internasyunal na komunidad bunsod ng di makatarungang patakarang panlabas nito laluna kaugnay ng sitwasyon sa Middle East. Sunud-sunod ang mga dagok na dinanas ng gubyernong Bush nitong mga nakaraang linggo sa larangang ligal, pulitikal at diplomatiko kapwa mula sa loob at labas ng bansa.

Magugunitang noong 2002 at 2003, matagumpay na naigiit ng US sa UN Security Council na bigyan ito ng tig-isang taong *immunity* o paglilibre ng mga sundalong Amerikano sa pag-uusig sa International Criminal Court (ICC). Ang ICC ay pandaigdigang hukumang itinatatag sa bisa ng isang internasyunal na tratado noong 1998 upang lumitis sa mga kaso ng henosidyo, krimen sa digmaan at sistematikong pang-aabuso sa karapatang-tao. Layunin ng US sa paggigiit ng *immunity* ang mapabwelo nang

husto ang agresyon nito sa Afghanistan, Iraq at iba pang bansang nais nitong sakupin. Nakuha ng US ang gayong *immunity* sa pagbabantang tututulan nito ang tinaguriang *peace keeping operations* ng UN kung hindi nito makukuha ang kagustuhan.

Ngunit ngayong taon, walang nagawa ang US sa harap ng mas matindi nang pagtutol ng mga myembro ng konseho sa hinihinging panibagong isang taong ekstensyon ng *immunity*. Sa pulong ng konseho noong Hunyo 24,



mariing ipinahayag ni Kofi Annan, Pangkalahatang Kalihim ng UN, na hindi na maaaring payagan ang gayong ekstensyon sa harap ng nabunyag na mga pang-aabuso ng mga tropang Amerikano sa mga bilanggong Iraqi sa Abu Ghraib.

Partikular na umani ng pagtutol ang kahilingan ng US na muling pagtibayin taun-taon ang *immunity* "hangga't kinakailangan." Kinundena ito ni Annan bilang isang pagtatangkang gawing permanente ang isang pansamantalang hakbanging pangkagipitan.

Samantala, sa US mismo, nagkaroon na ng upisyal na pagamin sa kawalang-batayan ng gera ng US sa Iraq. Sa ulat na inilabas ng US Senate Intelligence Committee nitong Hulyo 10, inihayag nito ang pagiging "depektibo" ng mga datos paniktik na pinagbatayan ng desisyong salakayin ang Iraq. Ayon dito, ang mga naging kongklusyon ng US kaugnay ng *weapons of mass destruction* (WMD) ng Iraq ay sobra o hindi suportado ng mga ulat paniktik. Isinangkalan ng gubyernong Bush ang umano'y mga WMD ng Iraq para ilunsad ang agresyon.

Ayon kay Sen. Jay Rockefeller,

"Mga dagok," sundan sa pahina 11

Iligal ang *security barrier* ng Israel

UMANI rin kamakailan ng kabiguan sa pandaigdigang korte ang guberno ng Israel, na pangunahing alyado ng US at katuwang nito sa pagpapatupad ng imperyalistang agresyon sa Middle East.

Idineklara ng International Court of Justice (ICJ) nitong Hulyo 9 na iligal ang pagtatayo ng "*security barrier*" ng Israel sa loob ng West Bank. Ang ICJ, na tinatawag ding World Court, ang kataas-taasang hudisyal na awtoridad ng UN. Ayon sa korte, "katumbas ng pananakop" ang pagtatayo ng naturang pader at nararapat na itigil kaagad. Ipinagigiba rin nito ang pader na naitayo na.

Ang pagtatayo ng naturang pader ay lantarang sinusupportahan ng US at UK. Nauna nang nagpahayag ang dalawang imperyalistang bansa na hindi dapat makialam ang korte sa naturang usapin. Sa 15 huwes ng ICJ, tanging si Thomas Buergenthal ng US ang sumalungat sa desisyon.

Bagamat hindi maoobliga ang Israel na tumalima sa desisyon ng ICJ, at sa katunaya'y tahasan itong sumusuway sa hatol, may malaking kabuluhan ang desisyon lalupa't ang naturang kaso ay isinampa hindi lamang ng Palestine kundi ng General Assembly o buong kapulungan ng UN. Pinagtitibay ng pasya ng korte ang makatarungang batayan ng pagtutol ng mga mamamayan at bansa sa daigdig sa pang-aapi ng Israel sa Palestine at sa pagsuporta ng US dito.

AB

Abusadong mga tropa, pinalalayas sa Negros

IGINIIT ng mga magsasaka mula sa Barangay Kalupaan, Trinidad at Mani-ak sa Guihulngan, Negros Oriental ang dagliang pagpapalayas sa mga abusadong militar, pulis at pwersang paramilitar sa kanilang lugar.

Ayon sa Kaugmaon-KMP, isang organisasyon ng mga magsasaka sa Guihulngan, ang pandarahas sa mga sibilyan ay lumala pagkatapos ng labanan ng AFP at Bagong Hukbong Bayan noong Hunyo 12 sa Barangay Tacpao, Guihulngan kung saan isang sundalo at dalawang Pulang mandirigma ang nasawi. Ang mga abusadong tropa, anito, ay mula sa 11th at 12th IB, PNP *regional mobile group* at Revolutionary Proletarian Army-Alex Boncayao Brigade.

Binatikos ng Kaugmaon-KMP ang takot at perwisyong idinudulot ng palagiang pagmamanman ng mga sundalo sa anito'y mga lider magsasaka na kabilang sa talaan ng militar. Dahil dito, anang Kaugmaon, hindi na makapaghanapbuhay ang mga magsasaka dahil nangangamba na silang pumunta sa kanilang mga bukirin. Kinundena rin ng mga magsasaka ang pagwasak ng mga sundalo sa kanilang mga pananim at pagpasok sa kanilang mga bahay nang walang pahintulot.

Pagbabayad-pinsala sa mga biktima ng batas militar, binalewala ng rehimeng Arroyo

ISINAISANTABI ng Malakanyang noong Hulyo 14 ang utos ng isang US *federal court* sa Honolulu, Hawaii na ilipat ang \$40 milyon sa \$684 milyong bahagi ng nakaw na yaman ng mga Marcos, tungo sa *bank account* na binuksan para sa mga biktima ng pang-aabuso sa karapatang-tao sa ilalim ng diktadurang Marcos. Ang \$40 milyon ay bahagi ng danyos na nakalaan para sa halos 10,000 biktima na nanalo noong 1995 sa kasong isinampa nila sa US laban sa mga Marcos.

Matatandaan na isa sa mga dahilan ng pagkadismaya ng National Democratic Front of the

Philippines (NDFP) sa ikatlong *round* ng pakikipag-usap nito sa GRP noong Hunyo ang kawalang-aksyon ni Arroyo kaugnay ng pangako niyang ayusin ang danyos na naipagwagi ng mga biktima.

Ang pagsuway ng rehimeng Arroyo sa utos ng korte sa US ay may kaugnayan din sa pakikipag-areglo ngayon ni Macapagal-Arroyo sa mga Marcos. Naghahagilap din si Arroyo ng pondo na gagamitin para punuan ang walang tigil sa pagtaas na depisit sa badyet ng gubyerno at pondohan ang kanyang hungkag na 10-puntong programa, mga gastos-militar at iba pa.

US, binatikos sa kumperensya ukol sa AIDS

BINATIKOS sa internasyunal na kumperensya ukol sa AIDS na idinaos sa Thailand noong Hulyo 11-16 ang mga patakaran at hakbangin ng US na humahadlang sa pagpapalaganap ng mga murang gamot laban sa HIV, ang mikrob-yong sanhi ng AIDS.

Tinuligsa ng mga delegado sa pagtitipon ang mga bilateral na kasunduang pinapasok ng US upang protektahan ang interes ng mga kumpanya ng gamot, taliwas sa isang internasyunal na kasunduang pinagtibay ng World Trade Organization sa Doha, Qatar noong 2001. Sa ilalim ng

kasunduan, binibigyang-laya ang mahihirap na bansa na balewalain ang mga *patent* ng mga kumpanya ng gamot upang makabili ng mas murang mga gamot laban sa AIDS at iba pang sakit.

Ang kasunduan sa Doha noong 2001 ay bumasag sa mahigpit na kontrol ng mga higanteng multinasyunal sa produksyon at pagbebenta ng mga gamot laban sa HIV. Nakatulong ito sa pagpapababa ng halaga ng pagpapagamot ng HIV mula mahigit \$10,000 (P55,000) taun-taon tungong isang dolyar (P55) o mas mababa pa araw-araw.

"Mga dagok," mula sa pahina 10

isang nakatataas na myembro ng naturang komite, ang tinukoy na mga kamalian ay "kabilang sa pinakamapaminsalang mga kabiguan sa paniktik sa kasaysayan ng US."

Ang ulat ng US Senate ay pinatutunayan din ng isang upisyal na imbestigasyon sa United Kingdom. Nitong Hulyo 14, iniulat ng komisyong nagsagawa ng imbestigasyon sa UK ang kongklusyon nito na ang Iraq ay

walang mga sandatang kemikal at *biological* noong lusubin ito ng koalisyong pinamumunuan ng US. Inihayag ng komisyon na ang mga datos paniktik ng UK kaugnay nito ay "depektibo, hindi mapagkakatiwalaan at hindi sapat." AB

**ANG****Bayan****Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo**Taon XXXV Blg. 14
Huyo 21, 2004
www.philippinerevolution.org*Editorial*

Lumalala ang pagkakahiwalay ng rehimeng Arroyo sa mamamayan

Patuloy na nahiihiwalay sa pulitika si Gloria Arroyo dahil sa kanyang bulok at brutal na paghahari at sa lumalalang pinsala at kahirapang idinudulot sa mamamayan ng walang pakundangan niyang pagpapakatuta sa imperyalismong US.

Hindi nawawala ang malaking duda ng nakararaming mamamayan sa kanyang pananalo sa eleksyon. Ikinagagalit ng mamamayan ang pagsupil ng rehimen sa mga nagpapahayag ng protesta sa nagdaang pinakamarumi, pinakamadaya at pinakamarahas na halalan sa buong kasaysayan ng mga reaksyunaryong eleksyon sa Pilipinas. Lalong ikinagagalit ng bayan ang pagsagasang ginagawa ngayon ng rehimen sa interes ng hustisya at ng mamamayan para sa pakikipag-"rekonsilyasyon" kina Estrada, sa mga Marcos at iba pang hinatulan na ng mamamayan dahil sa kanilang mga karumal-dumal na krimen laban sa bayan.

Araw-araw ay dumarami pa ang mamamayang nakukumbinsi na napakalaki nang pabigat sa masa ang pagpapatuloy ng dati nang mga maka-imperyalistang patakaran sa

ekonomya na buong sigasig namang ipinatatupad ng papet na rehimen. Nagsisilbi lamang ang mga patakarang ito sa mga imperyalistang kumpanyang hayok sa supertubo. Sinisikil niyon ang mga lokal na negosyo, winawasak ang mga produktibong pwersa, iniwang atrasado ang pambansang ekonomya at pinasasahol ang kahirapan ng mamamayan.

Ang neoliberalisasyon at kaakibat nitong pagbaha ng mga inangat na produktong sumasapaw sa mga lokal na kalakal ang sanhi kapwa ng lalong pagbagsak ng lokal na agrikultura at mga negosyo at ng laganap na disempleyo at paghihikahos sa buong kapuluan. Ang mas malalang larawan ng disempleyo at pagkabangkrap ng ekonomya sa Pilipinas ay naiibsan lamang ng pangingibang-bayan ng mahigit walong milyon nang Pilipino para doon maghanapbuhay.



Ang batas sa deregulasyon ng industriya ng langis ang dahilan ng walang tigil na pagtaas ng presyo ng mga produktong petrolyo at libreng-libreng pagkakamal ng gahiganteng tubo ng mga multinasyunal na kumpanya ng langis.

***Mga tampok
sa isyung ito...*****Pagpapalaya kay
Angelo dela Cruz****PAHINA 3****Matagumpay na
depensa sa Samar****PAHINA 6****Rebolusyonaryong
gawaing pangkultura****PAHINA 8**

Mga instruksyon sa paglilimbag

1. Ang **pahina 11**, na eksaktong kopya ng pahina 1 maliban sa mas mapusyaw ang *masthead* o *logo* ay para sa mga gumagamit ng *mimeo machine* o naglilimbag sa paraang *v-type*. Idinisenyo ito para hindi madaling makasira ng istensil.

2. Pag-*print* sa istensil:

- a) Sa *print dialog*, i-check ang **Print as image**
- b) Alisin ang *check* sa **Shrink oversized pages to paper size**
- k) I-click ang **Properties**
- d) I-click ang **Advanced**
- e) Tiyaking naka-set sa **100%** ang **Scaling**
- d) Ituloy ang pag-*print*

3. Hinihikayat ang mga kasama na ipaabot sa patnugutan ng *AB* ang anumang problema kaugnay ng paglilimbag sa pamamagitan ng *v-type*. Magpadala ng *email* sa angbayan@yahoo.com